



TUSI FAILOTU I KAIGA

Setema 2021

Togi: \$1:00

KO TE FAKAAOGAGA O TE TUSI FAILOTU I KAIGA

A te tusi tenei ne fakatoka atu mai loto i te Ulu Ofisa a te Ekalesia Kelisiano Tuvalu mo fesoasoani ki te fakatokaga mo faiga Lotu i Kaiga mo Fakapotopotoga, e pela foki mo lotu ‘talo i Asotapu. E se konei fua a mataupu talosia; kae e tuku matala eiloa manafai e isi aka ne isi mataupu e mafauaugina ke fakapitoa ki ei a te faiga talosaga mo tapuakiga.

KO TE FAKATOKAGA MO MATAUPU TALOSIA.

Ke talosia ne tatou a mataupu konei i te agaga maluga mo te talitonu me i te Atua Tolu Tasi Tapu e fakalogologo mai ki manakoga o o’tou loto takitokotasi e auala i otou talosaga fai konei.

- Ke mafai o lavea kae fakamaoniga a te iai o fuataga o te pulepulega ‘lei io me ko te taupulega ‘lei i te fakatelega o te Malo.
- Ko takitaki o te Malo ke fai a olotou tulafono mo ikuga fai ki te mea tela e loto ki ei te Atua.
- Ko sui filifilia ki te Palamene ke mafai o ga’lue fakatasi mo te manuia o te Atufenua.
- Ke mafai o atagina kae fakatalitonugina i te Malo a te tonu o tena muna fakavae: **‘Tuvalu mo te Atua’**.
- Ke mafai o fakaasi i te olaga o aso takitasi i takitaki o te Malo a te olaga tau-tua e se gata mo tino o te Atufenua kae maise te Atua mo tena Ekalesia tapu.
- Ko takitaki o te Atufenua ke mafai o ola i te olaga amiotonu, ava kae mataka ki te Atua.

KO TE EKALESLIA KELISIANO TUVALU.

- Ke tupu ola a te foitino lavea o Iesu Keliso (tela ko tena Ekalesia) i loto o te Atufenua.
- Ko Faifeau ke fakavae tonu a te galuega ki loto o te Atua, kae e se ko mea e ‘loto a latou ki ei.

- Ke mafai o tumau a te loto malosi mo te talitonu ki te Aliko te Atua mo ana fakamanuiaga ki a tatou i aso takitasi o te olaga.
- Ko Kelisiano katoa ke ola i te olaga talitonu mo te fakamoemoe ki te Aliko te Atua i mea katoa.
- Ko te Ekalesia ke folafola a te Tala ‘Lei o te Fakaolataga a te Atua ki tino katoa.
- Ke fakamalosi o fakataunu a te akoakoga o fanau i Fetuvalu e pela mo te fakamoemoega o te Ekalesia Kelisiano Tuvalu.

KE OLATA TATOU I SE OLAGATA OLATA MO NISI.

- Ke talo tatou mo nisi kola e fia ‘kai kae fia inu ki te Muna tonu o te Tala ‘Lei o te Fakaolataga a te Atua.
- Ke talo tatou mo tino puapuaga i te lalolagi, e penei mo tino konei:
- Tama’liki fakaa’lofa, fafine ko ‘mate a olotou avaga, latou kola ko pokotia a olotou olaga ona ko taua, matagi malosi mo nisi fakalavelave tupu fakafuasei i te lalolagi.
- Ko tino ko seai ne mea’kai mo mea inu, kae ko seai foki ne fale e mafai o faka’malu ki ei, mo latou ei kola e faigata o maua ne fesoasoani ki te tausiga o te olaga.
- Ko tino se katoatoa ‘lei a olotou foitino mo olotou mafaufau.
- Tino fakapuapuagatiagina ona ko pulepulega se ‘lei.

KO ASO FAKAMANATU I LOTO I TE ATUFENUA.

- Kalena a te Ekalesia Kelisiano Tuvalu.
- Aso o te Malo.
- Aso o Fenua takitasi.

KO FAKAPOTOPOTOGATA A TE EKALESIATA KAUFAKATASI.

- CWM, WCC, WARC, PCC, WACC mo nisi Fakapotopotoga.

Asotolu: 01/09/2021.

T/faitau: Fakaasiga: 2 : 12-17.

Fuaiupu filifilia: 17a “Tela la, ko latou kola e faitau ki te tusi tenei; ke na fakalogo la ki muna e fai atu ne te Agaga ki Ekalesia.

Ulu o te Aso: Taofi mau.

Te tusi tenei ko fakaasiga ne tusi ne Ioane mai te motu o Patamo i te taimi ne pei ei a ia ki te fale puipui. I te talaiga o te talalei e auala ia Iesu Keliso. E fakamalosi ne ia ki Ekalesia e fitu ke taofi mau ki te talalei. Te tusi tenei se fekau e fakamalosi ki te Ekalesia o Pelekamo i vaivaiga o te olaga talitonu o latou ki te talalei a Iesu Keliso. E maluga i mafaufauga o tino o te fakai o Pelekamo ke tapuaki latou ki atua faite me lei fua, mo te fai ne latou a uiga se lei. Te mafaufauga tenei e se tonu tela e ola i loto i Pelekamo. Te manakoga o te Atua ki a Ioane ke fakaoko atu ki te Ekalesia o Pelekamo ke tumau o taofi mau latou o talitonu kia Iesu Keliso ke fai mo olotou atua me manuia ei te olaga talitonu i lo’ te talitonu latou ki atua fapaupau mo te fai o uiga masei kola se fiafia ki ei te Atua. Tela la mo tatou e oko mai kia tatou vaivaiga konei o te olaga/ko uke foki talaiga fou konei ko oko mai ki tou atufenua. Ko te tino loa ia ia, kae fakamasaua mai ke tumau loa tatou i te Atua tela ne ola mai mo tatou ki te olaga tenei. Ko te Atua foki loa ne aumai ne ia tena Tama ko te mea ke mate ke ola te lalolagi katoa.

Asofa 02/09/2021.

T/faitau: Fakaasiga: 2 : 18-29.

Fuaiupu filifilia: 25. “Kae e tau mo koutou o taofi mautakitaki ki te mea ko maua ne koutou ke oko eiloa ki toku oko atu.

Aikupito. Te se’ fakalogo/ mo te se fakamaoni o Isalaelu ki te Atua, e pau mo te se fakalogo/ mo te se fakamaoni o Komeli ki tena avaga ko Hosea. E tenei te ata e fakatusa ki te fenua o te Atua ko Isalaelu. Tela ko mafaufau ei te Atua ke folafola atu ne ia ki tena fenua se ola fou mo Isalaelu. Ke manatua ne koutou toku fenua a toku alofa mo koutou tela ne toe ola mai ei koutou i lalo o taku pulepulega, ka olaola lei latou e pela me se fatoaga, kae fua malosi e pela mo te uaina o Lapanona. E tau loa latou o foki nei ki te Aliko te otou Atua. Ko otou agasala ko ala ei koutou o siga kae paku’. Foki nei ki te Aliko, kae ke fai te talo tenei mo taulaga a koutou ki a ia. Fakamagalo mai omotou agasala kae talia mai te motou talo, kae ka tavae ne matou a koe pela eiloa mo te motou tautoga. E tenei te ata otou olaga te ukega o taimi tatou e fulitua ki te Atua, e fai loa ne tatou mea e loto tatou ki ei. Kafai ko oko mai fakalavelave tatou loa ko manatua ne tatou te Atua ke foki tatou, te Atua se Atua e alofa, me ko ia ne mua o alofa mai, ne vau ei a ia o mate ke ola te lalolagi katoa.

la, te Aliko te motou Atua, e fakatoka' faeloa omotou mata ki a koe, ke oko ki te taimi e alofa mai ei koe ki a matou.

Ulu o te Aso: "Foliga o te alofa."

Ko te talo ke maua te alofa mautakitaki tela e fakaasi ei te fakamaoni mo te fakalogo e lavea ei te alofa e lavea i faiga, e pela mo te alofa o te Atua ki tena fenua ko Isalaelu. E pena foki te vasia o tino kola e talitonu ki tena alofa e foliga faeloa ki olotou olaga. Tela e fakamasaua ki tena fenua ke moa e mata kilokilo latou ki nisi atua, kae tumau takitaki latou i te fakatuanaki ki te Atua olotou tupuga. Kafai ko oko mai fakalavelave kia latou a latou e fakatoka' faeloa omotou mata ki a koe te Atua, ke oko ki te taimi e alofa mai ei koe ki a matou. Foliga o te alofa o te Atua e se mafai o mafuli mo tatou tagata agasala ne fakafoliga tena alofa e auala i tena Tama ko Iesu Keliso ke vau a ia o mate mo te lalolagi katoa, ke maua ei ne tatou te ola e se gata mai.

Asofa. 30/09/21.

T/faitau: Hosea: 14: 1-7.

Fuaiupu filifilia: 7. "Ka toe ola latou i lalo o taku puipuiga. Ka olaola lei latou e pela me se fatoaga kae fua malosi e pela me se togavine. Ka takutakua latou e pela mo te uaina o Lapanona.

Ulu o te Aso: Te alofa o te Atua mo Isalaelu.

Ko te fekau a te Atua ki tena pelofeta ko Hosea ke fakaoko ki tena fenua ko Isalaelu ke foki mai ki te Atua. Kae ke masaua ne latou te alofa o te Atua mo latou i taimi ne puapuaga ei latou i te nofoga latou i pulepulega a tino

Ulu o te Aso: Ko iloa te mea tonu tumau la i ei.

I te tusi ne faitau ne tatou ko te fekau ki te Ekalesia i Tuatila o fakamasaua ki a latou kola seki maua ne fakaosoosoga a te Tiapolo ke taofi mautakitaki ki te mea ko maua ne latou ke oko e iloa ki toku oko atu. Kafai ko iloa tonu ne latou tulaga tonu o te fakatuanakiga o latou ki a Iesu Keliso ke moa latou toe fakalogo ki nisi akoakoga kola e taku se ne latou akoakoga tonu ake tumau latou o fai te meatonu i loto i te ekalesia o Tuatila. Ke ola te alofa/te fai o te meatonu/taofi te fakatuanaki ke mautakitaki i loto i tena ekalesia. Te alofa o te Atua ne fakaasi i Kolokota ne mate ke ola te lalolagi katoa, e maua ei ne tatou te ola e se gata mai, mafai e fakatuanaki tatou ki tena mate mo tena toetu. Tela la kafai ko iloa ne koe te meatonu tumau loa i ei sa toe gasuesue.

Asolima. 03/09/2021.

T/faitau: Fakaasiga: 3 :1-13.

Fuaiupu filifilia: 2 "Tela la, ala mai, kae fakamalosi ake a te mea tena e i a koe, ka koi tuai o mate tonu e iloa. Me ko iloa ne au i tau mea ne fai e seki katoatoa tona lei i mua o te Atua.

Ulu o te Aso: Ala mai.

Te tusi ki te Ekalesia i Salataisa e fakamalosi ko tino ke tumau te olotou talitonuga kia Iesu Keliso i olotou loto. Me lavea atu te lasi o te talitonu latou ki atua fapaupau/mo olotou maumea faka te lalolagi/ako tulaga tenei e se tumau. Tela la te mea ne lagona ne latou te tala ia Iesu Keliso e fai ei mo mea e toe ala mai ei a te fakatuanakiga o latou kia Iesu. Ke moa e mate

te fakatuanaki o tino talitonu i te ekalesia o Salataisa ki te Agaga o te Atua. E mafai ei ne latou o masaua/ o salamo/kae fakalogo ki akoakoga kola e aumai ne te Agaga o te Atua ki tena ekalesia mo tino e ola i ei. Mo tatou e tau loa ke ala mai tou Agaga o te fakatuanaki ki te Atua me ko ia loa ko te fakavae papa otou fakatuanakiga ki te Atua e tokotasi tela maina ei otou fakamoemoga/kae fakamalosi ei otou fakatuanaki. Te Atua e ala mai faeloa o tausi ne ia tatou, kae ne aumai ne ia tena Tama ko Iesu Keli-so ke mate ke maua ne tatou a te ola e se gata mai.

Asoono 04/09/2021.

T/faitau: Fakaasiga: 3 :14-22.

Fuaiupu filifilia: 20. “Kiloke au e tu i te mataloa kae Tukituki atu, kafai se tino e lagona ne ia toku leo, kae tala ne ia te mataloa, e ulu atu au ki loto i tona fale o kai fakatasi mo ia, ko ia foki mo au.

Ulu o te Aso. Tukituki i te mataloa.

Te mataloa se koga tela e olo ei a tino ki loto mo te aumai ki tua. E fakaasi foki i konei kafai koe e fano o fai sau fekau ki se tino i te sua fale, a koe e tukituki muamua ne koe te mataloa ko fai mai ei te tino iloto i te fale ke tala te mataloa ko tala ei ne koe. E pena foki a Iesu e Tukituki faeloa i te mataloa otou loto ke lagona ne tatou tena leo ke fai ne tatou te mea tela e loto ke fai ne tatou i tou olaga. Te tusi tenei ko te tusi ki te ekalesia Laotikaia o fakamalosi te olaga tapuaki o tino kola e lagona ne latou te muna a te Atua kae se tala mai a mataloa olotou loto ki a ia. Iesu tenei loa e tu' mai o Tukituki ki otou loto ko te mea ke tala atu tou loto motou Agaga ke vau a ia o fai mo taki ala otou olaga, ke fai foki ne tatou tena finagalo a kooi ola tatou i te olaga tenei. Ne vau a ia o mate ke ola te lalolagi katoa.

Asolua. 28/09/21.

T/faitau: Salamo napa: 25: 1-10.

Fuaiupu filifilia: 4-5. “Te Aliko, akoako mai ki a au ou auala, Fakaasi mai foki ke iloa lei ne au. Akoako mai au ke ola i tau munatonu. Me i a koe ko toku Atua, tela e fakasao ne ia au. Au e talitonu faeloa ki a koe.

Ulu o te Aso: Au se tautali ki ou auala.

Ko te tusi o te Salamo e maua mai ei ne tatou a pese mo tavaega/talo mo se takitakiga mo se piupiuiga i auala ka fano a ia i ei e kese mo auala o te tino. Ko auala o te Aliko seai se tino e iloa ne ia, e seai se tino e mafai ne ia fano/io me tautali a ia i auala o te Aliko kola ne fano a ia i ei. Te tusi tenei se talo mo se puipuiga mai i te Aliko me fakatuaga a ia ki ei, ko ia foki e fakasao mai au mai te masiasi o te takavale mai oku fili. Kafai se tautali au ki ou auala ka maua au ne fakalavelave me se tonu toku auala, ke fai foki ne au koe mo taki ala o toku olaga e ola au i ei. Ka maua foki au ne fakalavelave o te olaga. Tela la e fakataua ne te fai Salamo ko Tavita pena foki tena fenua ko Isalaelu ko te Aliko ke akoako mai kia ia ana auala, kae fakaasi mai foki ke iloa lei ne au. Akoako mai au ke ola i tau munatonu, me i a koe ko toku Atua, tela e fakasao ne ia au. Au e talitonu faeloa ki a koe. Tela la a te Aliko e se mafai e iloa o tautali ki tou auala. Ko tena auala taua mo te lalolagi ne vau a ia o mate ke ola te lalolagi katoa, ke maua ei ne tatou a te ola se gata mai. Mafai e talitonu tatou ki tena mate mo tena toetu.

Asotolu. 29/09/21.

T/faitau: Salamo napa 123: 1-4.

Fuaiupu filifilia: 2. “E pela mo te tavini e fakalagolago ki tena pule tagata. E pena foki te tavini fafine e fakalagolago ki tena pule fafine. Tela

te lalolagi katoa.

Asogafua. 27/09/21.

T/faitau: Teutelenome: 4: 25-31.

Fuaiupu filifilia: 31. “A te Aliko se Atua alofa, e se mafai o tiaki ne ia koutou io me ta fakamasei koutou, kae ka se mafai o puli i a ia a te feagaiga a ia ne fai mo otou tupuga.

Ulu o te Aso: Te Atua e tautali loa ki tena feagaiga.

Ko muna fakamasaua a te Atua ki tena fenua ko Isalaelu ke sa ifo ki tupua, kae ke masaua ne latou te leo o te Atua tela ne faipati atu kia koutou mai loto i te afi i te Mauga Sinai, kae seki lavea ne koutou ana foliga. E fakaasi i konei mese Atua e alofa o fakamasaua ki tena fenua me ia ia e tautali e iloa ki tena feagaiga tela ne faipati a ia ki tena fenua moa e ifo ki tupua fakatea. Kafai koutou e se fakalogo mai a koutou ka agasala, kae ka ave ne au koutou keatea mai te fenua ko Kanana ke salalau valevale koutou ki Malo' o te lalolagi. Kafai koutou e sala ki te Aliko te otou Atua i fenua kona, kae kafai e tonu te otou sala mo te loto talitonu, kae ka maua e iloa ne koutou. Tela la kafai ko tupu katoa a mea kona ki a koutou, ko tena uiga, ko koutou ka saga atu ki te Aliko o fakalogo ki a ia. A te Aliko se Atua alofa, e se mafai o tiaki ne ia koutou io me ta fakamasei koutou, kae ka se mafai o puli i a ia a te feagaiga a ia ne fai mo otou tupuga. Te Atua e tautali loa ki tena feagaiga me ia ia ka vau o mate ke ola te lalolagi katoa, ke maua foki ne tatou te ola e se gata mai. Mafai e talitonu tatou ki tena mate mo tena toetu.

Asotapu 05/09/2021. Tasi ia Keliso

T/faitau: Kalatia: 1:1-10.

Fuaiupu filifilia: 6: “Ko oko e iloa i toku ofo i a koutou te vave o tiakina ne koutou a ia tela ne kalagagina ne ia koutou i te alofa tauanoa o Keliso, ka ko fuli koutou ki se tala lei fakaatea.

Ulu o te Aso: Se fiafia.

Ko te tusi a Paulo ki te ekalesia o Kalatia o fakamalosi ne ia loto o Kelisiano mo te vave o fuli latou ki nisi talitonuga, ako puli ia latou akoakoga kola ne akoako atu kia latou, pela mene akoako atu ke ulu sua taliga o fano sua taliga ona ko te vave o talia ne latou akoakoga fou ko lagona ne latou. Tela e fakamalosi ei ne Paulo me tasi loa te talalei se mafai o lua talalei a te tino e tauloto ne ia i tena olaga. Kae e lavea ne te apositolo tela ne se fiafia me ko isi ne tino iloto i te mafutaga e taki se' ne latou a tino ki olotou manakoga. Tela e fakaasi ne te apositolo ke se sala ne latou te loto o tino ake sala ne latou te meatonu mo te loto o te Atua e tokotasi. Mo tatou ko oko mai ata konei ki tou atu fenua ko tupu nei i vaitau konei, tela ke tumau tatou i te tou fakavae tela ne ola mai mo tatou mai tou tua ke tumau la i ei. Me fai mai “ Ko au loa tenei, konei e aumai I oku tua fakaeteete koutou mene pelofeta loi konei. Te Atua ne se fiafia kia tatou ona ko tou se fakalogo, tela ne vau ei tena ke mate ke ola te lalolagi katoa.

Asogafua. 06/09/2021.

T/faitau. Kalatia: 1: 11-24.

Fuaiupu filifilia. 23. “Ne logo fua latou i pati. “A ia tela ne fakasaua mai ki a tatou i aso ko teka atu, kae nei ko talai mai ne ia te fakatuanaki

tela ne taumafai a ia o ofa.

Ulu o te Aso. *Mafuli te olaga ki te lei.*

Kafai koe ne nofo ise fale ko masei, e tau o fai se faiga ke mafuli ki se fale fou. Ne kilo a mata ne molimaugina ko fanake ei se mafaufauga pe-nei mea nei ko te tino tela ne fakasaua ne ia te olaga o tino talitonu i te talalei, kae tenei ko mafuli te olaga ki te lei ko vau nei o talai mai te talalei kia Iesu Keliso. Se lagona tonu ona ko te fakaasiga kia Saulo i tena auala ki Tamaseko tela ko maua ne ia se igoa fou ko Paulo ako talia ne ia te leo alofa ke fai a ia mo tino e ave ne ia te talalei ki feitu e faa o te lalolagi. Nea tala ne ave ne te matagi ki toku olaga faka-Iutaia mo oku taina iloto i te galuega a te Atua, ne tala tonu. Kae nei ko mafuli te olaga ki te lei. Tela ko fai a ia mo tino o ave te tala lei ki feitu e faa o te lalolagi. E masei mafai e fuli mai koe mai te lei ki te masei, kae lei ma fuli mai koe mai te masei ki te lei. Tela e tau ke tuku atu tou olaga ki te Atua e auala i talosaga me mafai loa o mafuli te olaga ki te lei mafai e fakamuamua ne tatou te Atua. Te Atua ne alofa mai ki te tagata tela ne tuku mai ei ne ia tena Tama ke vau o mate ke maua ne tatou te olaga lei. Kae maise te ola se gata mai.

Asolua: 07/09/2021.

T/faitau: Kalatia: 2:1-10.

Fuaiupu filifilia: 4. *“Kae ona ko taina loi kola ne taumafai ke ofi mai ki loto, ne ulu mai ki loto o alamatei a te saolotoga o tatou i a Keliso Iesu, ko te mea ke fakapologa tatou ne latou.*

latou i te olotou malaga i te tai kula, ke oko ki te fenua o te folafolaga ko Kanana. Ke tumau loa latou i te olotou olaga tapuaki ki te Atua ke tumau loa ke moa e mafuli. Ko tena alofa ne maua ei ne latou te ola se gata mai mafai e talitonu tatou ki tena mate i luga i te sataulo mo tena toetu e maua ei ne tatou te ola e se gata mai.

Asotapu. 26/09/21.

T/faitau: Tagiga a Ielemia : 3: 22-33.

Fuaiupu filifilia: 22,23a. *“A te alofa mo te agalei o te Aliko e tumau faeloa. E fou faeloa pela mot e tafataeao, kae mauiinoa tonu e iloa.*

Ulu o te Aso. *Ko te loto fakafetai.*

Te tusi tenei ne muna o te tagi fanoanoa katoa e tusi fakapese e uiga ki te takavale o Ielusalema i te tausaga e 586 T.M.K. {tausaga mai mua o Keliso} mo te fakamaofaga o te fakai mo te avega o tino i te tafeaga. E ui e iloa i te lasi o muna fanoanoa i te tusi tenei, kae lavea atu foki e iloa me isi te loto talitonu ki te Atua mo te fakamoemoega lei mo aso fakamuli. A tagi konei e fakaaoga ne tino Iutaia i tapuakiga a latou i aso e fakalikiliki mo tapuakiga mo te tagi fanoanoa i aso e fakamanatu ei te fakalavelave tena ne tupu i te tausaga 586 T.M.K. E lavea ne tatou i konei e uke fakalavelave e oko ki tino o te fenua o te Atua, ako te alofa mo te agalei o te Aliko e tumau faeloa, tela e maua foki loa te malosi mo te fou o te malosi i taeao katoa, mo fakatokatokaga mo faiga tapuakiga a latou. E talitonu latou mo te mauiinoa me ko te Atua fua e fesoasoani i taimi e puapuaga ei latou. E pena foki tou olaga i fiafiaga mo fanoanoaga ko te Atua loa e kau mo tatou. E fesoasoani mai loa ki a tatou, ako tatou ke avatu loa tou loto fakafetai ki a ia i tena alofa ne vau ei a ia o mate i te sataulo ke ola

ko oti ne ta ne ia se tama pulumakau mo fai taulaga mo agasala mo se tama mamoe mo fai te taulaga sunu. Kafai ko ulu atu ei a Alona ki te potu tafasili i te taua e tau mo ia o koukou muamua ko pei ei ki gatu fakafaitaulaga, ko te gatu lino loa, ko te tivae, te fusi, mo te pulou laugatu. Kafai e kilo tatou ki fakatoka mo faitaulaga sili te fakamagaloga o agasala.

Asoono. 25/09/21.

T/faitau: Levitiko: 23: 33-43.

Fuaiupu filifilia: 42/43. “A tino Isalaelu katoa e tau o nofo i fakamalumu i aso e fitu, ko te mea ke iloa ne otou fanau fakamuli me ne fakanofu ne te Aliko a tino Isalaelu i fakamalumu i te taimi ne taki mai ei ne ia latou keatea mo Aikupito. A ia ko te Aliko te otou Atua.

Ulu o te Aso: Ko Kaiga fiafia o fale fakamalumu.

Te tusi o Levitiko se tusi e fakamatala ei a faifaiga o tapuakiga, mo aso fakamanatu kola e fai sale ne tino Isalaelu i aso taumua. Te pogai taua I te tusi tenei ko te malu o te Atua, mo tapuakiga kola e tau o fai ne ona tino ke tumau ei te va lei o latou Isalaelu mo te Atua. A muna taua loa o te tusi tenei e maua i te mataupu e sefuluiva ako fuaiupu e sefulu valu. E fakaioga ne Iesu ko te lua o tulafono tafasili i te taua”Alofa ki tou tuakoi e pela motou alofa ki a koe.” E fakataua foki i te tusi ko te alofa o te Atua ki Isalaelu mo te tulaga o te olaga e fakatino ei te olaga tapuaki o latou ki te Atua i fale fakamalumu, mo aso kola e tau ei mo latou o maopoopo fakatasi mo te faiga tapuakiga. Kae ofo atu se taulaga meakai, taulaga sunu, taulaga saito, taulaga manu, mo taulaga uaina i aso takitisi. Ke moa e puli te alofa o te Atua mo latou i ata kola ne lavea ne

Ulu o te Aso: Saolotoga.

Kafai se tino ko matala mai i se fakalavelave a ia ko taku ko maua ne ia te “saolotoga”. Ko foki a Paulo ki Ielusalema ne olo laua mo Panapa mo Tito. Ne fano Paulo mese fakaasiga mai te Atua ke fano a ia ki Ielusalema o folafola te tala lei fakatasi mo ana taina ne faimalaga latou. E uke fakalavelave fakafeagai mo latou ko nisi taina latou kola ko talia ne latou talalei ko fakamasei ne latou io me ko alama ne latou te saolotoga ko maua ne latou o galue o talai atu te talalei ia Iesu Keliso. Ko fakaaoga se ne latou i olotou lagona ke fakapolaga ne latou i faiga masei kola e pokotia ei te olaga fakatuanaki. Tela kafai ko maua te saolotoga nese tino o folafola te talalei e tasi, tela ne lagona ne tatou, ke moa la e ola te mafaufau ke kau mai koe o fuli ki se tulaga tela ka faite ne koe te masei/ io me fakapolaga ne koe a tino ki au pulepulega masei. Ako te ata taua ko te galue fakatasi mo te manuia o tena galuega. Ko maua ei ne tino te saolotoga manuia o tena olaga fia tavini. Te Atua ne aumai ne ia tena Tama e tokotasi ko te mea ke mate ke maua ne tatou te saolotoga mai tou agasala.

Asotolu: 08/09/2021.

T/faitau: Kalatia: 2: 11-21.

Fuaiupu filifilia: 19-20a. “Ne tupu ake au i te Tulafono, kae ne tamate au ne te Tulafono. Ne tupu te mea nei ko te mea ke ola au mo te Atua. Ne fakasataulo fakatasi maua mo Keliso; kae se ko au tenei e ola atu, ka ko Keliso tenei ko ola i loto ia au.

Ulu o te Aso: Ola faka te Agaga.

Ko fakamalosi i konei ne Paulo me fakaolagina a tino Iutaia mo tino o fenua fakatea i te fakatuanaki. E se takuamiotonugina i galue a te Tulafono, ka ko te fakatuanaki ki a Iesu Keliso e takuamiotonugina tatou, Kae iloa ake nei ne tatou a tatou ne tino agasala. Tatou ne fai mai e agasala ona ko Atamu ne seki fakalogo ki fakatonuga a te Atua ke moa e kai ki fuataga o te lakau i loto i te kogaloto o te fatoaga. Atamu ne seki fakalogo ki te Atua ne fai e iloa te mea e loto a ia ki ei. Tenei ko fanau mai ei ne tatou te agasala. Te Atua la se manako ko tatou ke agasala ne sala ne ia se auala ke toe foki atu te tagata tela ko tena fakatusa tapu. Ne fanai fo a ia mai tena tulaga fakatupu o vau ke fanau a ia i te fale o manu, ne mate i te tolu o aso ne toetu manumalo te Aliko, ke maua ne te tagata te ola, kae maise te ola faka te Agaga i te ola seai se gatamaiga. Mafai ko talia ne tatou Iesu Keliso ke fai motou fakaola, e pela foki mo tena mate mo tena toetu e maua ei ne tatou te ola se gata mai.

Asofa 09/09/2021.

T/faitau: Kalatia: 3: 1-14.

Fuaiupu filifilia: 4a. “E a, i te otou taofi i te otou fakatuanaki i a Keliso e seai sona aoga?”

Ulu o te Aso: Fale tusi Paia.

Te fale tusi paia se koga tela e tausi ei a fakamatalaga mea tau te tusi tapu. Tela e mafai o faigofie ei o maua se fesoasoani mo se fakamainaga i tulaga e fai ei sau sukesukega. Se fale foki tela e maua mai ei ne mafaufauga lei kae maise e faite mai ei te olaga faka te Agaga ona me faitau ne koe tena muna e fakamalosi foki I ei te olaga fakatuanaki o te

me tefea te koga e nofo ei se Isalaelu e tau loa o masaua ne latou te aso tenei mese ne tupu ake loam o latou mai olotou kaiga’. Ko vaega kola e ofo atu ne latou mo fai te olotou taulaga ki te Atua ko vaega katoa mai olotou galuega te faiga fatoaga mo te fagaiga olotou manu ko mea kona e avatu ne latou mo fai te olotou taulaga ki te Atua. Ko fuataga mai olotou fatoaga kola ko fuataga lei, mo manu fagai kola seai ne olotou masaki kona e avatu ei ne latou mo fai te lotou taulaga e fakamagalo ei olotou agasala ki te Atua. Tatou e talitonu me tou agasala e fakamagalo ne te Atua e auala i tena mealofa mo te lalolagi e auala i tena Tama e tokotasi tela ko Iesu Keliso ne vau o mate ne maligi tena toto mo te fakamagaloga agasala a te lalolagi.

Asolima. 24/09/21.

T/faitau: Levitiko: 16: 2-10, 29-34.

Fuaiupu filifilia: 34a. “A fakatonuga konei e tau o fai faeloa i taimi katoa fakamuli. A te sauniga tenei e tau o fai fakatasi i tausaga.

Ulu o te Aso: Ko fai ne te faitaulaga sili te fakamagaloga.

Ite tusi faitau a tatou i te asoanafi e faipati ki te fakatokaga mo te fakamagaloga agasala. Te tusi faitau a tatou i te asonei e faipati ki te galuega fai a te faitaulaga mo vaega kola e fakatapu ei tena foitino kooi tuai te faitaulaga sili o ulu ki loto i te potu tapu tenei. Ne faipati ei te Aliko kia Mose ke faipati ki tena taina ko Alona me se tau mo ia o ulu atu ki loto i te Potu tafasili i te tapu, tela mai tua o te laugatu pui, i so se taimi, i so se taimi, na ko te taimi tau e iloa, me e tena te koga e fanake ei au e foliga kit e au i luga o te pono o te Pusa o te Feagaiga. Kafai se fakalogo a ia, ko ia ka mate. E mafai ne ia o ulu ki loto i te potu tafasili i te tapu manafai

mo te faiga o kaiga fiafia o te tausaga fou. Tela e tau o ofo atu se taulaga meakai lei ki te Aliko, kae moa e fai ne otou galuega i te fitu o aso. E tau eiloa o fakamalu, kae ke lagona ne koutou te tagi o leo o pu e fakamasaua mai ei te fakatokaga mo te faiga tapuakiga. E avatu ei ne latou te vae o te fakafetai ki te Atua i tena alofa mo latou i taimi ne fakafeagai latou fakalavelave. Ko meakai kona e avatu mo fai te taulaga e tau ne meakai e ma, seki fakaaoga mo fai nisi mea, kae mafai ne latou o aumai mai fuataga lei olotou fatoaga pena foki mai olotou manu fagai. E penei foki loam o te olaga e ola ei tatou e masaua ne tatou mafai ko lagona ne tatou pele e kini i taeao mo afiafi/asotolu mo Asotapu ko te taimi tena e maopoopo ki ei a tino o te Ekalesia mot e faiga tapuakiga ki te Atua. E tau loa mo tatou o fakamalosi ki tapuakiga fai i tou Ekalesia pela mese kaiga' e tasi e tapuaki ki te Atua.

Asofa. 23/09/21.

T/faitau: Levitiko: 23: 26-32.

Fuaiupu filifilia. 27. “I te po sefulu o te fitu o masina ko te aso e fai ei te sauniga faka-te-lotu o te tausaga, e fakama ei a agasala a te fenua. I te aso tena e tapu se tino e kai, kae maopoopo katoa mo tapuakiga, kae ofo atu se taulaga meakai ki te Atua.

Ulu o te Aso: Te aso o te fakamagaloga.

Te aso tenei se aso e taua ki te fenua o Isalaelu mese fakatonuga ki faiga o kaiga faka-te-lotu i te taimi e maopoopo ei a tino Isalaelu mo tapuakiga. E ono aso e fai ei otou galuega, kae masaua i te fitu o aso tela ko te Sapati, se aso malolo. I te aso tena e seai ne galuega e fai, kae e tau koutou o maopoopo o fai otou tapuakiga. A te Sapati e o te Aliko faitalia

tino talitonu. Kae lavea ne tatou i mata o te fakatuanaki te “FALE TUSI PAIA” ko tou loto motou Agaga me pefea te poko mo te lauefa mo te malosi otou fakatuanaki kia Keliso io me mata e malosi tou fakatuanaki io me seai sona aoga. E tau o tali me aoga mene vau a Iesu o mate mo toetu i aso e tolu ke maua ei ne tatou te ola ese gata mai. Mafai e talitonu tatou ki tena mate mo tena toetu. E tau loa mo tatou o taofi tou fakatuanaki kia Iesu Keliso me aoga.

Asolima. 10/09/2021.

T/faitau: Kalatia: 3: 15-21.

Fuaiupu filifilia: 21. “E a, e teke te tulafono ki te folafolaga a te Atua? Ikai, e se pena; i te mea moi fai ne tuku mai te tulafono ke aumai ne ia te ola ki tino, penei e maua te amiotonu i te tulafono.

Ulu o te Aso: Ola i te tulafono.

Te tusi a Paulo ne tusi ki tino o fenua fakatea kola e ola i Kalatia o fakamaina te tulafono, me i te tulafono ne aumai o fakaasi mai te mea masei, tela kafai ko ofa ne koe te tulafono ko maua koe ne te masei ko koe foki ka fakasala. Ako te feagaiga se mea tela e fai ne se tokolua ke tauto ke fai io me ke se fai, ia laua loa te maliega i te la feagaiga. Ako te feagaiga ne fai ne te Atua ki a Apelaamo se feagaiga ne fai loa ne ia tokotasi i tena vasia mo te tagata, se manako o fakaaoga a agelu io me ko Mose ke fai mo ana fekau ko te Atua loa mo tena tonu tokotasi seai se tino e fuafua mo ia. Te ola tatou i te tulafono se mea e lei ke iloa ne tatou te masei ko puipui tatou ke fai ne tatou te meatonu tela e fiafia ki ei te Atua. Ao te tulafono e aoga, ako taimi ne vau ei Iesu ne faipati a ia me tino e maua ne ia te ola se gata mai se ko te tulafono, ako fakatuanaki ki tena Tama ko Iesu Keliso I

tena mate ko maua ei ne tatou te ola se gata mai.

Asoono 11/09/2021.

T/faitau: Kalatia: 3: 23-29.

Fuaiupu filifilia: 28. “E seai se kessekese i se Iutaia io me se Eleni, se pologa me se saoloto, se tagata me se fafine, me ko tasi katoa e iloa koutou i a Keliso Iesu.

Ulu o te Aso: Ko te tasi.

Ko fakamasaua ne te apositolo ko Paulo ki tino Iutaia mo te Eleni, se pologa me se saoloto, se tagata me se fafine me ko tasi ia Keliso. Me ia laua ko tasi me ia laua ne faite ne te Atua ki ana fakatusa tapu. Ka kooi tuai o oko mai te fakatuanaki, a tatou ne i lalo i te pule a te tulafono, tela ko maua ne tatou a te fakatuanaki kia Iesu ki tena mate, e maua ei ne tatou te ola e se gata mai manafai e fakatuanaki tatou ki tena mate mo tena toetu. Tela ko te tasi ei tatou ki tou talitonuga moa tatou e loto fakalotolotolua ko mafai ei ne tatou o mafuilifuli kae se tumau. Tatou e tau loa mo tatou o tumau ki te fakatuanaki ne ola mai ei tatou i te tasi otou fakatuanaki. E se tau mo tatou o fakakesekese ne tatou a tino me ia tatou e tasi i tena alofa tauanoa ne vau a ia o mate ke ola te lalolagi katoa. Tela la e tau e iloa tatou o tasi i tena alofa.

Asotapu 12/09/2021. SAOLOTOGA IA KELISO.

T/faitau: Kalatia: 4:1– 11

Fuaiupu filifilia: Kalatia: 4: 1-11.

Fuaiupu filifilia: 9. “Kae nei ko iloa ne koutou a te Atua, ko iloa foki ne te Atua a koutou, Ne mafai pefea koutou o fuli ki feitu vaivai o agaga pule

Te tusi o Salamo ko te tusi pese mo te tusi talo o te Tusi Tapu. E fakaaoga ne te fenua ko Isalaelu i olotou tapuakiga. E isi ne pese o vikiga mo tapuakiga ki te Atua, e isi ne talo mo se fesoasoani, mo se puipuiga. Ko fai-pati a te tusi fai salamo mo te aumaiga ne te Atua tena fenua ko Isalaelu mai Aikupito ne maua ne latou te fiafia mo te kata me ko maua ne latou te ola mo te fiafia mai tulaga ne fakafeagai mo latou i te nofo pologa i Aikupito. Ko maua ne latou te avanoaga mo te fenua mo latou ko Kanana tela ne aumai ne te Atua mo olotou nofo e mafai ei ne latou o toe galue fita mo te tokitokiga o te laukele e maua mai ei se manuia o te olaga mo te olotou manuia. Te olaga e ola tatou i ei e tau mo tatou o galue mot e fita e maua mai ei ne tatou ne mea lei. Me i te laukele ko tou fenua ne aumai ne te Atua ke galue ne tatou ke maua ne tatou fuataga lei motou ola. Kafai tatou e galue mo te fita i loto tena galuega e manuia tou fakamoemoega, e maua foki ne tatou ne Agaga faopoopo mo latou fia maua te fesoasoani.

Asotolu 22/09/21.

T/faitau: Levitiko: 23: 23—25.

Fuaiupu filifilia: 23/24. “A te po muamua o te fitu o masina ke fakamanatu ne koutou me se aso malolo taua, kae ka maopoopo mai koutou ki faiga tapuakiga manafai ko tagi mai te pu.

Ulu o te Aso: Ko te malu’ o te leo o te pu.

Te leo o te pu e fakailoa mai ei te fili ko oko mai/ io me ko maua te manu-malo tela ko mafai ei o fakatagi a pu. Te tusi ne faitau ne tatou ko te kauga fiafia o te Tausaga fou tela e fakatagi ei a pu i aso muamua o masina e fakamanatu ei a aso malolo mo te fakamaopoopo mai te fenua o te Atua

Asogafua. 20/09/21.

T/faitau: Ielemia: 31: 10-14.

Fuaiupu filifilia: 13b. “Ka fakamafanafana ne au latou kae fuli te lotou tagi fanoanoa ki te fiafia. Te loto fanoanoa ki te fiafia.

Ulu o te Aso. Ko te alofa o te Atua.

Ko te tusi a te pelofetai ko Ielemia o fakamasaua ki tino o tena fenua ke moa e puli ia latou te Atua olotou tupuga tela ne fakafoki mai ne ia latou mai Aikupito ke iloa ne malo te malosi o te Atua Isalaelu tela e tavini kae tapuaki latou ki ei. E fakaasi ei me i te Atua olotou tupuga se Atua alofa kae fesoasoani kia latou i taimi o puapuaga mo te fanoanoa mafai ko oko atu kia latou. Ke aumai latou o usu pese mo te fiafia i te mauaga o Siona i mealofa kola e maua ne latou se mafai o laulau i te uke. Tela la fafine mo tamataene saka mo te fiafia me ko lavea ne koutou toku alofa i mea kola e avatu ne au e fakamalie ei otou loto. Ke moa la e puli ia koutou toku alofa. Te alofa o te Atua e molimau ne tatou i tou olaga e lava faeloa tena alofa mo koe mo au. Te alofa o te Atua ne molimau ne te lalolagi ne vau tena Tama ke mate mo te lalolagi katoa, ke maua ei ne tatou te ola se gata mai mafai e talitonu tatou ki tena mate mo tena toetu.

Asolua. 21/09/21.

T/faitau. Salamo napa 126: 1—6.

Fuaiupu filifilia: 5, 6. “A latou kola ne toki lakau kae tagi, ka tau ne latou te taukai mo te fiafia; A latou kola ne tagi i te lotou ologa o toki a fuataga, ka foki mai mo te pese fiafia. I te laku maiga o fuaga o te taukai.

Ulu o te Aso. Galue mo te fita e maua mai ei se manuia

muamua o te lalolagi kola e vaivai mo te se taula? Ai a e toe manako ei koutou ke toe fai mo pologa i ei?

Ulu o te Aso: Mafaufauga.

I loto i te olaga e lua pau loa mea i tou mafaufauga e fai ne tatou me fai ne tatou te lei io meko te masei. Kafai ko talia ne tatou te Atua ki tou olaga ko iloa foki ne te Atua ko fai mo tino tonu i loto i tena kaiga, Kaia koe ko toe manako ko koe ke toe foki tatou ke pule koe ne satani ke fakamasei ne ia tou olaga, ke fai foki koe mo ana pologa. Tenei te fekau ne fakamalosi ne Paulo ki tino Kalatia kese toe foki ki te masei tela ko satani kae ke ola te mafaufauga ke tumau loa latou ki te Atua tela ko ia ko te faimeatonu, tela kose mafai foki o fakapululi a latou ne te Atua, ko se fai foki latou pela mene pologa a satani. Ke tonu tou mafaufauga mo te tumau tatou ki te tou Tamana faka te Lagi tela ko te Atua. Tela la mo tatou i te olaga tenei ke tonu faeloa tou mafaufauga ki mea e fai ne tatou, i ta tulaga faka Tamana ko taua ko ulu o kaiga’ ke taki ne taua ta kaiga’ ki te loto mo te Agaga o te Atua e manuia ei ta kaiga’ pena foki ta fanau. Ne tonu te mafaufauga o te Atua ona ko te tulaga o te tagata ko pologa ne te agasala, te mafaufauga ola o te Atua ke vau a ia o mate i te sataulo ke maua ei ne taou te saolotoga, tela ko te ola e seai se gatamaiga.

Asogafua 13/09/2021.

T/faitau: Kalatia: 4: 12-20.

Fuaiupu filifilia: 13-14. “e masaua ne koutou a te pogai, ne ala ei o folafola atu ne au a te tala lei ki a koutou i te taimi muamua, ona ko toku masaki. E ui e iloa i te fai toku foitino vaivai e pela mo se tofotofoga ki a koutou, kae ne seki fakatauemu kae teke mai koutou ki a au, me ne talia

ne koutou au e pela mo se agelu a te Atua, e pela foki eiloa mo Keliso Iesu.

Ulu o te Aso: Fakamalamalama.

Ko tusi te tusi a Paulo o fakaasi ana manatu e fakamalosi ei a tino Kalatia ona tulaga ne nofo latou mo te se iloa ne latou te Atua, tela ko nofo pologa ei latou o fai tulaga faka te lalolagi. Kae fakafetai me ko iloa ne koutou te Atua, ko mafai ei o iloa foki koutou ne te Atua. Kae ko fakafesili me pefea loa koutou tino Kalatia o fuli ki vaivaiga o agaga pule muamua o te lalolagi mo te se taulia, kaia foki e manako koutou ke toe fai koutou mo pologa. E fakamalamala atu ne au ki a koutou me i te mafutaga a tatou, se mafutaga e gali, e ui eiloa e maua au ne foitino fakamasakisaki, ne seki fakavaivai otou loto ona ko oku masaki kae ne lago malo ne koutou e pela mese agelu a te Atua, e pela foki eiloa mo Keliso Iesu. Tela kafai ko fakamalamalama atu tulaga o te olaga o te fakatuanaki ke tumau la koutou, e tau koutou o tumau loa kae se fakalogo ki nisi fakamatalaga. E pena foki tatou kafai ko oti ne fakamalamalama atu te tala lei kia tatou ke tumau la i ei, e mafai ne koe o teke atu te tiapolo mo ana fakaosoosoga ki te olaga. Te Atua ne fakamalamalama ne ia tena auala ne vau a ia ke mate ke ola te lalolagi katoa.

Asolua: 14/09/2021.

T/faitau: Kalatia: 4: 21-5:1.

Fuaiupu filifilia: 5: 1. “A te saolotoga tenei ko maua ne tatou, ne fakasaoloto ei tatou ne Keliso. tumau la i ei, kae sa toe tuku atu koutou ke toe fai mo pologa.

fakavae mai ne ou tua mo ou Matua. Tela ne manuia ei koe, me tasi eiloa te Sataulo tela ne toki i tuapa o Kolokota, e maua ei ne tatou te ola se gata mai, mafai e talitonu tatou ki tena toetu mai te mate. Ke maua ei ne tatou a te ola e se gata mai mafai e talitonu tatou ki tena mate mo tena toetu.

Asotapu: 19/09/21. 19-25. **Ko te Tusi Paia i te taimi e kati ei Lakau Kaina.**

T/faitau: Teutelonome: 26: 1-15.

Fuaiupu filifilia: 2: “e tau mo koutou taki tokotasi o tuku ki se kete te vaega muamua o fuaga o lakau kesekese a koutou kola ne kati, ko olo ei mo koutou ki te koga tapuaki o te Aliko tela e tasi eiloa.

Ulu o te Aso: Avatu ne fuataga o lakau lei ki te Atua.

Ko fakamasaua ne te Atua ki tena fenua ko Isalaelu mo vaega o fuataga o lakau kola e tau o avatu ne latou ne fuataga lei e seai fuataga kola e masei. Ko fuataga kola e aumai ne latou mai olotou fatoaga e tau ne fuataga lei mai vaega kesekese olotou fatoaga ko fuataga muamua loa olotou fatoaga. Ke tuku ki loto i te kete ko avatu ei ki te Atua e auala i faitaulaga mo fai te tapuakiga latou o fakafetai ki te Atua i fuataga lei ko maua ne latou mai ana fakamanuia. E tiga te nofo pologa o latou mai lalo o Aikupito ako latou e masaua loa ne latou te olotou Atua olotou tupuga mene fakasao ne ia latou mai puapuaga, mo te aumaiga latou ki te fenua o te folafolaga ko Kanana. Ko vaega kola e toe mai olotou fatoaga ko mafai o fakaaoga ne fafine ko mate olotou avaga mo tamaliki fakalofa. E mafai ne tatou o avatu ki te sui o te Atua tela ko te faifeau tausi o te fenua, fuataga muamua loa au fatoaga ko fakamanuia atu ei, te kaiga, pela foki fuataga au fatoaga.

Keliso. E tenei foki te lagona ne oko ki te fenua o tatou ko Niutao i te taimi ne oko ei te talalei ki te fenua, e ui eiloa te faigata ki tino o talia. Te Agaga o te Atua ne galue o fakamalosi te fakatuanaki mo te galue fakatasi tou tua o talia. E ui eiloa te faigata, kae ne talia eiloa ne tou tua, tela ko mafai ei ne tatou o fai mea lei ki tino/pena foki i loto i kaaiga Kelisiano. Iesu ne fakatuanaki ki tena Tamana mo te galue malos o fakaoala tino kola e fia maua se fesoasoani.

Asoono. 18/09/21.

T/faitau: Kalatia: 6: 11-18.

Fuaiupu filifilia: 14. “Ka ko au, e tasi faeloa a te mea e fakamatamata au ki ei, ko te sataulo eiloa o te tou Aliko ko Iesu Keliso, ko tena uiga ko tena sataulo ko fai ei manako faka te lalolagi mo mea mate ki a au, e pena foki au ki manako faka te lalolagi, se mea mate.

Ulu o te Aso: Ko te sataulo fua o Iesu Keliso ke masaua faeloa ne au i toku olaga.

Ko fakataua ne Paulo ke fakateete tatou ki tino kola e fia fakamatamata kae fia takulei ne tino i mea faka te foitino ko latou kona e taumafai o faimalo koutou ke pilitome ko te mea ke fakamatamata ei latou i otou foitino. Mai lagona kona mo mafauauga o te apositolo e kese mao ei ana manatu me i tena lagona ko te sataulo fua o Iesu Keliso e tau o fakamatamata a ia ki ei, se ko mea faka te lalolagi e maua ei ne ia te sataulo Iesu Keliso. Ake fai te sataulo o Keliso mo mea e masaua faeloa ne ia i tena olaga katoa, tela ko fai ei a ia mo tino fou. Mo tatou ko uke sataulo ko inivesi mai ki loto tou atufenua. Se Sataulo fea foki e sala koe ki ei, ko te sataulo loa tela ne ola mai ei mo koe ki te lalolagi tenei, tela ne

Ulu o te Aso. “Fakamalalo.

Ko fakamasaua ne Paulo i tena tusi ki te Ekalesia o Kalatia me i te saolotoga ne maua mai ia Iesu Keliso mai tena loto fakamalalo ona ko te manakoga o tena Tamana ko te Atua ke vau tena Tama ke fai a ia mo taulaga ki te lalolagi e auala i tena mate i luga i te sataulo ke ola te lalolagi katoa. E seai sena agasala mo tena se, a ia ne vau o mate ona ko agasala a te lalolagi. Ko agasala Atamu ona ko tena se fakalogo ki te fakatonuga a te Atua i loto fatoaga o Etena, ne manatu mafa te Atua ke toe foki mai te tagata. E tenei te auala ne toe foki mai ei te tagata, e auala i tena Tama ko Iesu Keliso ke vau o mate ke magalo ana agasala. Tela ko maua ei ne tatou te saolotoga mai ia Iesu Keliso e auala i tena mate. Tela muna Paulo tumau la i ei tou fakatuanaki. Me ko te pilitome io me ko te se pilitome, e se taulia a mea kona i a Keliso Iesu, kae na ko te “FAKATUANAKI” fua tela e galue i te alofa, e taulia. E tau mo tatou o tumau tou fakatuanaki kia Iesu i tena mate mo tena toetu manumalo e maua ei ne tatou te ola e se gata mai. Ke ola te loto fakamalalo i tou olaga, e tumau foki ei te fakatuanaki. E penei mo te fakamalalo o tena ke tautau a ia te sataulo ke ola te lalolagi katoa.

Asotolu: 15/09/2021.

T/faitau: Kalatia: 5: 2-15.

Fuaiupu filifilia: 6. “Me ko te pilitome io me ko te se pilitome, e se taulia a mea kona i a Keliso: kae na ko te fakatuanaki fua tela e galue i te alofa, e tumau.

Ulu o te Aso: E pau fua.

Ko fakamasaua ne Paulo ki tino Kalatia me pau fua me pilitome koe mese pilitome e pau fua, kae manatua mese taulia a mea konei ia Keliso. Ako mea e fakataua I konei ko te fakatuanaki tela e fakavae I te alofa e tumau. E gali ma ola te fakatuanaki kae ola te alofa me tumau se mafai o gasuesue. Me kafai e uke mafaufauga a te fakatuanaki foki e fakalotolotolua ona me kooi sala loa ki te meatonu. Te meatonu ko iloa ne koe e tau loa te fakatuanaki o malosi, me pau fua mene nofo koe i vaitaimi o Iesu io mene ola koe i vaitau konei ako te lagona ne koe akoakoga mai ou matua tenei ne mafai ei koe o fanau ki te lalolagi nei. Ne maua foki ou tofiga mo galuega mai te fakavae ne maina mai ei koe ki te lalolagi tenei. E pau fua me ko Iesu loa mai ou matua ke oko mai loa ki te aso nei, tela e tumau loa i ei tou talitonuga kia Iesu tela ne mate i te tolu o aso ne toetu manumalo mai i te mate, ke maua ei ne tatou te ola ese gata mai. Kae sa taumafai o fuli ki se isi talitonuga.

Asofa: 16/09/2021.

T/faitau: Kalatia: 5: 16-26.

Fuaiupu filifilia: 21b. “Ko polopoloki ne au koutou nei, pela foki mo aku polopolokiga mua; a tino e fai ne latou a mea konei, e se talia ne latou a te Atua ke fai mo olotou tupu.

Ulu o te Aso: Ke fakaaoga fakalei a muna polopoloki.

A muna polopoloki ne muna e fakaasi ei te loto alofa o te tino tela polopoloki ne ia te olaga. Ko faipati a Paulo ki muna polopoloki ki tino Kalatia ke fakamao latou mo uiga masei kola e fiafia ki ei te tiapolo kola se manakogina ke ola iloto i te olaga o tino kola ko talia ne latou Iesu ke fai mo olotou takitaki. Mai tulaga konei ko se mafai o lagona ne latou a te

taumafaiga a te tiapolo. Kae ko lagona loa ne latou te musumusuga o te Agaga o te Atua i olotou loto, tela ko se mafai ei ne latou o fai a uiga kola e se fiafia ki ei te Atua sulaitetapu, amio masei, loto ita, manatu fakapito, finau valea mo te fiamavaevae mo nisi uiga ake kola ko mafai ei tatou o mao mo te Atua. Ke aoga muna polopoloki kola e maua ne koe i tou olaga, mai loto i te kaiga’, i loto tapuakiga, i fakatasitasiga ko muna kona ke fakaaoga la ne koe fakalei e manuia foki ei te olaga. Iesu ne fakaaoga fakalei ne ia muna polopoloki ana Matua, pena foki muna tena Tamana faka te Lagi. Ke vau a ia o mate ke ola te lalolagi katoa, ke maua ei ne tatou te manuia nei ke oko atu loa se gata mai.

Asolima. 17/09/2021.

T/faitau: Kalatia: 6: 1-10.

Fuaiupu filifilia: 10. “Tenei la, e tau mo tatou o fai te mea lei ki tino katoa, kae fakasilisili ki a latou kola e i loto i te kaiga Kelisiano.

Ulu o te Aso: Fakatuanaki mo te galue.

Ite tusi ne faitau ne tatou ko pati fakamalosi/fakamasaua a Paulo ki tino Kalatia ke fakamalosi o fakatauamo fakatasi olotou amoga, ke fakaasi a mea lei ki tino katoa, kae fakasilisili ki a latou kola e iloto i te Kaiga Kelisiano. Kafai e ola te fakatuanaki mo te galue fakatasi ko iku ei mo te manuia a te fakamoemoega. Paulo se tasi o tino ne fuli tena olaga mai te masei ki te lei ona ko tena kalagagina ne te Atua. Ne galue mo te alofa mo fakamaoni a Paulo iloto i te galuega a te Atua, e ui e iloa i te lavea ne tino mese tokotasi ne fakasaua ki olaga o tino talitonu ki te talalei. Ne fai te tiute o Paulo ki te mafai mo tena fakalagolago ki te Atua ne maua ei ne Agaga faopopo o tino talitonu ki tena talaiga o te Talalei e auala ia Iesu